

REGLUGERÐ um stuðning við sauðfjárrækt.

I. kafli

Almenn ákvæði

1. gr.

Gildissvið

Reglugerð þessi gildir um stuðningsgreiðslur í sauðfjárrækt, svo sem beingreiðslur, greiðslur vegna ullarnýtingar og svæðisbundinn stuðning, samkvæmt samningi um starfsskilyrði sauðfjárræktar dags. 19. febrúar 2016.

2. gr.

Orðskýringar

Í reglugerð þessari hafa eftirtalin orð þá merkingu sem hér segir:

1. *Bústofn*: Vefforrit Matvælastofnunar til að halda utan um dýraeftirlit og forðagæslu í samræmi við lög um búfjárhald nr. 38/2013.
2. *Fjárvís*: Tölvukerfi og gagnagrunnur í eigu Bændasamtaka Íslands, sem heldur utan um afurðaskýrsluhald í sauðfjárrækt. Gögn sem verða til vegna skylduskráninga í samræmi við reglugerð þessa eru í umsjón og á ábyrgð MAST.
3. *Nýliði*: Einstaklingur á aldrinum 20–40 ára sem er að fjárfesta í búrekstri eða hlut í búrekstri í fyrsta skipti eða lögaðili þar sem a.m.k. 25% lögaðilans er í eigu einstaklings sem telst nýliði.

3. gr.

Handhafar greiðslna

Greiðslur samkvæmt reglugerð þessari fá framleiðendur einir sem uppfylla eftirtalin skilyrði:

- a. skráðir eigendur eða leigjendur lögbýlis og
- b. stunda sauðfjárrækt og reka sauðfjárbú á lögbýlinu með virkt virðisaukaskattsnúmer og starfsemi þeirra fellur undir atvinnugreinanúmer 01 og 02 í atvinnuvegaflokkun Hagstofu Íslands, sbr. ÍSAT2008, þó ekki starfsemi í undirflokkum 01.61, 01.62, 01.63, 01.64, 01.70 og 02.40.

Hjón og einstaklingar í óvígðri sambúð, samkvæmt skráningu í Þjóðskrá, sem standa saman að búrekstri geta óskað eftir því við Matvælastofnun að greiðslur samkvæmt reglugerð þessari sé skipt jafnt á milli aðila. Þegar um fleiri sjálfstæða rekstraraðila er að ræða með aðskilinn búrekstur getur hver og einn þeirra verið handhafi greiðslna.

Skilyrði fyrir greiðslum eru einnig:

- a) þátttaka í afurðaskýrsluhaldi Bændasamtaka Íslands með fullnægjandi skilum í samræmi við 4. gr. og
- b) fullnægjandi skil á haustskýrslu í Bústofn skv. 10. gr. laga nr. 38/2013 um búfjárhald.

4. gr.

Afurðaskýrsluhald

Til að þátttaka í afurðaskýrsluhald í sauðfjárrækt sé metin fullnægjandi skulu eftirfarandi skilyrði vera uppfyllt, en miðað er við að unnt sé að rekja uppruna og afdrif allra gripa í hjörðinni á einfaldan og öruggan hátt:

1. Fullnægjandi skil á hjarðbók og heilsukorti, og rétt framkvæmd á merkingum sauðfjár, í samræmi við reglugerð um merkingar búfjár nr. 916/2012 með síðari breytingum.

2. Allur fjárstofn bús framleiðanda skal skráður í afurðaskýrsluhald framleiðanda. Eftirfarandi skal skrá eða vera til staðar (lágmarkskröfur):
 - a) Fangafdrif allra áa.
 - b) Burðardagsetningu áa og fjölda fæddra lamba hjá hverri á.
 - c) Öll lifandi fædd lömb með lambanúmeri.
 - d) Afdrif allra lamba að hausti og fullorðinsnúmer (einstaklingsnúmer) ásettra lamba, lífpungi og litarnúmer þeirra.
 - e) Fallþunga allra sláturlamba, sem byggir á innlesnum sláturgögnum frá sláturhúsum.
 - f) Upplýsingar um förgun og vanhöld allra fullorðinna gripa á búinu.
3. Framleiðandi ber ábyrgð á skilum á fullnægjandi afurðaskýrsluhaldi á réttum tíma. Upplýsingum um voruppgjör skal skila eigi síðar en 15. júlí á skýrsluhaldsári og haustuppgjöri eigi síðar en 31. desember á skýrsluhaldsári.
4. Skráning á afurðaskýrsluhaldi samkvæmt þessari grein skal fara fram í gegnum Fjárvís.

Matvælastofnun skal tryggður fullnægjandi aðgangur að Fjárvísi og undirliggjandi gagnagrunni til að tryggja m.a. að Fjárvís uppfylli þær kröfur sem gerðar eru til fullnægjandi afurðaskýrsluhalds í samræmi við ofangreint.

5. gr.

Fyrirkomulag stuðningsgreiðslna

Matvælastofnun skal gera ársáætlun fyrir 15. febrúar um heildargreiðslur allra framleiðenda, sem eiga rétt á greiðslum skv. 3. gr. Heildargreiðslur hvers framleiðanda samkvæmt reglugerð þessari skulu áætlaðar miðað við:

- a. framleiðslu fyrra árs,
- b. fjölda vetrarfóðraðra kinda á haustskýrslu í Bústofni,
- c. skráð greiðslumark í ærgildum í upphafi árs og
- d. fjárlög hvers árs.

Heildargreiðslur taka til beingreiðslna, gæðastýringargreiðslna skv. reglugerð nr. 1160/2013 um gæðastýrða sauðfjárframleiðslu með síðari breytingum, greiðslna fyrir ullarnýtingu og greiðslna vegna svæðisbundins stuðnings. Heildargreiðslu ársins verður deilt í 12 jafna hluta. Fyrstu tveir hlutar eru greiddir í febrúar og síðan mánaðarlega til og með desember.

Heildargreiðslur til nýliða skal áætla út frá ærgildum og fjölda vetrarfóðraðra kinda samkvæmt haustskýrslu í Bústofni. Miða skal við að hver vetrarfóðruð ær tveggja vetra og eldri skili 20 kg af lambakjöti og hver veturgömul ær 10 kg. Jafnframt skal miða við hver að vetrarfóðruð kind skili 1,6 kg af hreinni ull. Skiptingu framleiðslu í flokka skal miða við framleiðslu á landsvísu árið á undan. Ef nýliði tekur við búi í fullum rekstri er Matvælastofnun heimilt að áætla greiðslur miðað við síðasta framleiðsluár fyrri eiganda.

Ársáætlun um heildargreiðslur skal kynnt framleiðanda eigi síðar en 15. febrúar ár hvert. Athugasemdir við áætlunina skulu berast stofnuninni innan 20 daga frá dagsetningu þeirra. Matvælastofnun skal svara öllum athugasemdum eigi síðar en 15. apríl ár hvert.

Matvælastofnun er heimilt að leiðrétta áætlun um heildargreiðslur til framleiðenda ef forsendur greiðslna breytast.

Uppgjör á heildargreiðslum fyrra árs skal fara fram í febrúar árið eftir. Þá verða greiðslur til framleiðenda leiðréttar í samræmi við raunverulega framleiðslu ársins og vegna annarra breytinga á forsendum heildargreiðslna, svo sem ef þeir standast ekki skilyrði fyrir álagsgreiðslu í gæðastýrði sauðfjárframleiðslu.

Framleiðanda er skylt að endurgreiða stuðningsgreiðslur ef þær reynast byggðar á röngum eða brostnum forsendum að hluta til eða að öllu leyti.

Matvælastofnun er heimilt að endurkrefja framleiðanda um stuðningsgreiðslur þótt nýr framleiðandi hafi tekið við búi og atvik sem rekja má til hans leiði til þess að bú uppfyllir ekki skilyrði fyrir stuðningsgreiðslum enda eru stuðningsgreiðslur inntar af hendi með fyrirvara um að bú fullnægi skilyrðum fyrir stuðningsgreiðslum.

Matvælastofnun ber ekki að endurkrefja framleiðanda um greiddar stuðningsgreiðslur þótt nýr framleiðandi hafi tekið við búinu þegar lokauppgjör fer fram. Sama gildir ef greiðslur hafa gengið til fyrri framleiðanda þegar ekki hefur verið tilkynnt um breytingu á handhafa að búi.

Matvælastofnun er heimilt að skuldajafna endurgreiðslukröfu vegna greiðslna af öðrum stuðningsgreiðslum skv. samningi um starfsskilyrði í sauðfjárrækt.

Matvælastofnun er heimilt að skerða eða fella niður stuðningsgreiðslur ef sauðfjárframleiðandi gefur rangar upplýsingar um ásettan fjölda sauðfjár eða stundar ólöglega sölu eða dreifingu á kjöti af heimaslátruðu sauðfé eða brýtur á annan hátt reglur eða samningsbundin ákvæði um afsetningu afurða.

Hver framleiðandi getur ekki fengið framlög samkvæmt reglugerð þessari sem nema hærra hlutfalli en 0,4% af árlegum heildarframlögum samkvæmt samningi um starfsskilyrði sauðfjárræktar.

6. gr.

Opinbert eftirlit

Ráðherra fer með yfirstjórn mála samkvæmt reglugerð þessari. Matvælastofnun fer með framkvæmd reglugerðarinnar og hefur eftirlit með að ákvæðum hennar sé fylgt.

7. gr.

Framkvæmdanefnd búvörusamninga

Framkvæmdanefnd búvörusamninga er samráðsvettvangur samningsaðila samnings um starfsskilyrði sauðfjárræktar.

Framkvæmdanefnd búvörusamninga aflar upplýsinga um þróun framleiðslu og sölu á sauðfjárafurðum, afurðaverð, inn- og útflutning afurða, afkomuþróun í sauðfjárrækt auk annarra upplýsinga sem hafa þýðingu fyrir framkvæmd samnings um starfsskilyrði sauðfjárræktar.

Á grundvelli upplýsinga skv. 2. mgr. getur framkvæmdanefnd búvörusamninga ákveðið að færa fjármuni á milli einstakra verkefna sem falla undir samning um starfsskilyrði sauðfjárræktar sbr. töflu í viðauka I við samninginn. Heimilt er að færa árlega allt að 20% þeirrar fjárhæðar sem ætlaðar eru til hvers verkefnis. Nefndin skal tilkynna Matvælastofnun um tilfærslur sem taka eiga gildi um áramót eigi síðar en 1. desember árið á undan.

Matvælastofnun skal ráðstafa framlögum samkvæmt ákvörðun framkvæmdanefndar búvörusamninga.

II. kafli

Greiðslumark og beingreiðslur

8. gr.

Greiðslumark lögbýla

Greiðslumark lögbýla við gildistöku reglugerðar þessarar skal miðast við greiðslumark eins og það er skráð hjá Matvælastofnun eftir að búið er að skrá tilkynningar um framsal sem skilað verður inn fyrir 15. janúar 2017.

Greiðslumark sem er óvirkt frá gildistöku reglugerðar þessarar í þrjú ár samfelldt skal felld úr gildi. Fjármunum sem þannig falla til skal Matvælastofnun ráðstafa að fengnum tillögum framkvæmdanefndar búvörusamninga.

9. gr.

Beingreiðslur

Beingreiðslur til lögbýla taka breytingum í samræmi við ákvæði IX. kafla búvörulaga nr. 99/1993, með síðari breytingum.

Matvælastofnun heldur skrá yfir rétthafa greiðslumarks lögbýla og handhafa beingreiðslna samkvæmt því. Réttur til beingreiðslna flyst milli aðila innan lögbýlis við ábúendaskipti og við breytingu skráningar ef um hjón eða einstaklinga í óvígðri sambúð er að ræða.

Fjármunum sem ekki er ráðstafað vegna skertra beingreiðslna eða óvirks greiðslumarks skal ráðstafað til annarra verkefna samkvæmt reglugerð þessari samkvæmt ákvörðun framkvæmdanefndar búvörusamninga.

10. gr.

Aðilaskipti

Heimilt er að flytja greiðslumark milli lögbýla. Aðilaskipti að greiðslumarki taka þó ekki gildi fyrir en staðfesting Matvælastofnunar liggur fyrir. Framsal greiðslumarks skal taka gildi 1. janúar ár hvert og beingreiðslur greiðast framsalshafa frá sama tíma. Tilkynna skal Matvælastofnun um framsal fyrir 15. janúar ár hvert.

Með tilkynningu um flutning greiðslumarks sem bundið er við lögbýli skal fylgja staðfesting um eignarhald að lögbýli og samþykki ábúanda, sameigenda og veðhafa í lögbýlinu.

Leiguliða er heimilt að kaupa greiðslumark á lögbýli til 31. desember 2020 og skal það sérstaklega skráð á nafn hans.

Með tilkynningu um aðilaskipti að sérskráðu greiðslumarki í eigu ábúanda eða leiguliða við lok ábúðar eða leigu, sbr. 4. mgr. 38. gr. búvörulaga, skal fylgja staðfesting á eignarhaldi lögbýlis og því að eiganda jarðar hafi verið boðinn forkaupsréttur.

11. gr.

Innlausn

Matvælastofnun annast innlausn greiðslumarks. Handhafi greiðslumarks getur óskað eftir innlausn á greiðslumarki sínu á þar til gerðu eyðublaði sem Matvælastofnun útvegar. Tilkynningu um innlausn skal skila eigi síðar en 20. janúar á því ári sem innlausn á að fara fram. Matvælastofnun skal auglýsa innlausnarvirði greiðslumarks skv. 3. mgr. a.m.k. tveimur vikum áður en skilafrestur tilkynninga um innlausn rennur út.

Með beiðni um innlaun á greiðslumarki skal fylgja staðfesting um eignarhald að lögbýli og samþykki ábúanda, sameigenda og veðhafa í lögbýlinu.

Fyrir innleyst greiðslumark greiðir ríkissjóður núvirt andvirði beingreiðslna tveggja næstu almanaksára eftir að innlausnar er óskað. Núvirt andvirði beingreiðslna skal reiknast miðað við stýrivexti Seðlabankans á 1. janúar ár hvert. Matvælastofnun skal greiða innleyst greiðslumark til handhafa þess eigi síðar en 15. febrúar á innlausnarári. Fjármunum sem ekki ganga út skal Matvælastofnun ráðstafa samkvæmt ákvörðun framkvæmdanefndar búvörusamninga.

12. gr.

Ásetningshlutfall

Til að fá fullar beingreiðslur þarf framleiðandi að eiga að lágmarki 0,7 vetrarfóðraðar kindur fyrir hvert ærgildi greiðslumarks.

Nái ásetningur ekki því lágmarki skerðast beingreiðslur hlutfallslega. Ef greiðslumarki lögbýlisins er skipt á fleiri en einn rekstraraðila, þá skal miðað við greiðslumark og ásetning hvers rekstraraðila fyrir sig.

Ásetningshlutfall hjá framleiðendum sem hafa skorið niður fé til útrýmingar bótaskyldum sjúkdómum skal á fyrsta almanaksári eftir fjártöku aðeins nema 1/3 af því sem ákveðið er samkvæmt 1. mgr. og á öðru ári 2/3, til að þeir haldi fullum beingreiðslum.

III. kafli

Ullarnýting

13. gr.

Ráðstöfun fjármuna til ullarnýtingar

Fjármunum til ullarnýtingar skal ráðstafað á eftirgreindan hátt:

1. Að minnsta kosti 85% skulu greiðast til framleiðenda ullar skv. 3. gr. Fjárhæðinni skal deilt niður hlutfallslega eftir gæðum á hvert kíló hreinnar ullar miðað við alla innlagða ull á tímabilinu 1. nóvember – 31. október samkvæmt verðskrá sem Matvælastofnun útbýr samkvæmt ákvörðun framkvæmdanefndar búvörusamninga. Skilyrði fyrir greiðslu fjármuna til framleiðenda er að ullin hafi verið flokkuð og metin í samræmi við lög nr. 57/1990, um flokkun og mat á gærum og ull, og reglugerð nr. 856/2003, um ullarmat.
2. Allt að 15% skulu greiðast til kaupenda ullar sem uppfylla skilyrði skv. 2. mgr. 14. gr. Fjárhæðin skal þó eigi vera hærri en sem nemur kostnaði við söfnun ullarinnar. Gangi af fjárhæðinni skal mismunur færður á 1. tölul.

Verði fjármunum skv. 1. og 2. tölul. ekki ráðstafað innan almanaksársins er Matvælastofnun heimilt að færa þá á milli ára.

Framkvæmdanefnd búvörusamninga ákveður notkun stuðla til að greiða mishátt álag á einstaka gæðaflokka ullar samkvæmt tillögu Landssamtaka sauðfjárbænda.

14. gr.

Auglýsing

Í september ár hvert auglýsir Matvælastofnun, t.d. í Bændablaðinu, eftir umsækjendum um stuðning til söfnunar ullar, sbr. 2. tölul. 13. gr. Umsóknum skal skilað á skrifstofu Matvælastofnunar á sérstökum eyðublöðum sem stofnunin lætur í té eigi síðar en tveimur vikum eftir birtingu auglýsingar.

Stuðningur til söfnunar ullar er háður því að umsækjandi uppfylli eftirfarandi skilyrði:

1. Aðili skal vera reiðubúinn að taka við allri vinnsluhæfri ull af öllum framleiðendum sem þess óska.
2. Aðili þarf að sækja ull heim til bænda eða taka á móti ullinni á móttökustöð sem ekki er lengra frá hverjum einstökum seljanda ullar en 100 km.
3. 30% allrar ullar sem aðili móttækur skal þvegin hér á landi og jafnframt unnið úr þessari sömu ull band, lopi eða samsvarandi vara hérlandis.

15. gr.

Upplýsingaskylda

Ullarkaupendur sem þiggja stuðning til söfnunar ullar skulu skila Matvælastofnun upplýsingum um móttækna ull fyrir 5. hvers mánaðar. Upplýsingar skulu veittar um magn, flokka og þvott sundurliðaðar niður á hvern seljanda. Upplýsingarnar skal veita með sendingu afreikninga eða sölunótna en ef upplýsingar eru sendar á rafrænu formi er ekki skylt að afreikningar eða sölunótur fylgi, aðeins að gögnin séu til staðar og aðgengileg verði eftir þeim leitað. Þá skulu ullarkaupendur skila Matvælastofnun ársskýrslu um ullarnýtingu fyrir 1. febrúar ár hvert, þ.m.t. um atriði sem talin eru upp í 1.-3. tölul. 2. mgr. 14. gr.

16. gr.

Greiðslur

Matvælastofnun ráðstafar greiðslum til framleiðendaullar. Til að framleiðandi hljóti greiðslur skv. 1. tölul. 12. gr. þurfa að liggja fyrir staðfestar upplýsingar frá aðila sem hlýtur stuðning til söfnunar um móttækna ull skv. 14. og 15. gr.

Til að framleiðandi fái greiðslur fyrir innlagða ull sem hann selur til annarra en þeirra sem hljóta stuðning til söfnunar, sbr. 14. og 15. gr., þarf hann að sjá til þess að upplýsingar, staðfestar af ullarkaupanda, um þau atriði sem koma fram í 15. gr. berist Matvælastofnun. Framleiðandi og ullarkaupandi geta samið um að hinn síðarnefndi skili upplýsingunum.

Heimilt er að beita stuðlum þannig að mishátt álag er greitt á einstaka gæðaflokka ullar skv. ákvörðun framkvæmdanefndar búvörusamninga.

17. gr.

Uppgjör

Matvælastofnun skal gera samning við þá ullarkaupendur sem hljóta stuðning til söfnunar ullar, sbr. 14. og 15. gr. Í slíkum samningi skal ullarkaupandi skuldbinda sig til þess að uppfylla þau skilyrði sem fram koma í 1.-3. tölul. 2. mgr. 14. gr. sem og 15. gr.

Matvælastofnun er heimilt að halda eftir 15% framlaga við gerð ársáætlunar sem greidd eru þegar heildarframleiðsla liggur fyrir. Matvælastofnun skal fyrir 1. mars ár hvert ljúka uppgjóri gagnvart þeim sem hljóta stuðning til söfnunar ullar og seljendum ullar.

IV. kafli

Svæðisbundinn stuðningur

18. gr.

Markmið

Markmið svæðisbundins stuðnings er að veita framleiðendum stuðning sem eru á landsvæðum sem háðust eru sauðfjárrækt og takmarkaðir möguleikar eru fyrir framleiðendur á annarri tekjuöflun.

19. gr.

Sauðfjáarsvæði

Framleiðendur sem eiga rétt á svæðisbundnum stuðning skulu uppfylla öll eftirfarandi skilyrði:

- a. Á lögbýlum sem er í 40 km akstursfjarlægð eða lengra frá þéttbýlisstöðum sem eru með yfir 1.000 íbúa.
- b. Á lögbýlum sem er í 75 km akstursfjarlægð eða lengra frá þéttbýlisstöðum sem eru með yfir 10.000 íbúa.
- c. Á lögbýlum sem er í 150 km akstursfjarlægð eða lengra frá Reykjavík.

Matvælastofnun skal byggja á gögnum frá Byggðastofnun hvað varðar lista yfir þau sauðfjárbú sem standast ofangreind skilyrði.

Matvælastofnun er heimilt að víkja frá skilyrðum 1. mgr. ef framleiðandi sýnir fram á með gögnum að vegur að lögbýli þar sem hann stundar sauðfjárrækt lokist vegna snjóá, skriðufalla og vatnavaxta í meira en fimm daga á ári síðast liðin tvö ár.

20 gr.

Rétthafar greiðslna

Rétthafar greiðslna skulu uppfylla eftirtalin skilyrði:

- a. Handhafi greiðslna samkvæmt reglugerð þessari skv. 3. gr.
- b. Átt 250 ær eða fleiri samkvæmt forðagæsluskýrslu næstliðið haust.

Framleiðendur í Árneshreppi teljast þó uppfylla b. lið 1. mgr. ef þeir eiga 100 ær eða fleiri samkvæmt forðagæsluskýrslu næstliðið haust.

21. gr.

Framlög

Framlög til svæðisbundins stuðnings skulu skiptast á milli rétthafa á hverjum tíma og taka breytingum miðað við breytingar á fjölda rétthafa.

Framleiðendur í Árneshreppi skulu fá greitt 25% álag á framlög skv. 1. mgr.

VI. kafli

Gildistaka og fleira

22. gr.

Kæruheimild

Ákvörðun Matvælastofnunar um skráningu á greiðslumarki lögbýla og rétt til beinna greiðslna er heimilt að skjóta til úrskurðar ráðherra innan þriggja mánaða, sbr. VII. kafla stjórnsýslulaga.

23. gr.

Endurgreiðsla ofgreiddra greiðslna

Ef greiðslur samkvæmt reglugerð þessari hafa verið ofgreiddar ber handhafa greiðslna að endurgreiða ríkinu hið ofgreidda fé.

24. gr.

Skerðing og niðurfelling stuðningsgreiðslna

Matvælastofnun er heimilt að skerða eða fella niður stuðningsgreiðslur ef framleiðandi í sauðfjárrækt gefur vísitandi rangar upplýsingar eða brýtur á annan hátt skilyrði í reglugerð þessari.

25. gr.
Viðurlög

Brot á reglugerð þessari varða viðurlögum samkvæmt búvörulögum nr. 99/1993, með síðari breytingum. Með mál út af brotum skal farið skv. lögum nr. 88/2008 um meðferð sakamála.

26. gr.
Gildistaka

Reglugerð þessi er sett samkvæmt heimild í búvörulögum nr. 99/1993, með síðari breytingum og búnaðarlögum nr. 70/1998, með síðari breytingum. Reglugerðin öðlast þegar gildi. Jafnframt er felld úr gildi reglugerð nr. 1221/2015 um greiðslumark sauðfjár á lögbýlum 2016.

Ákvæði til bráðabirgða

Þrátt fyrir 26. gr. skal verðskrá Matvælastofnunar vegna ullamýtingar halda gildi sínu til 31. október 2017 skv. 1. tl. 2. gr. verklagsreglna um ráðstöfun fjár í viðauka I við reglugerð nr. 1221/2015 um greiðslumark sauðfjár á lögbýlum 2016.

Þrátt fyrir 26. gr. skulu verklagsreglur í viðauka IV við reglugerð nr. 1221/2015 um greiðslumark sauðfjár á lögbýlum 2016 halda gildi sínu gagnvart þeim aðilum sem fengið hafa bústofnskaupastyrki til frumbýlinga til og með 31. desember 2016. Einnig er þeim aðilum heimilt að leggja fram framhaldsumsóknir á árinu 2017 samkvæmt ákvæðum þeirra reglna.

Þrátt fyrir 26. gr. skal uppgjör ársins 2016 fara fram í samræmi við ákvæði reglugerðar nr. 1221/2015 um greiðslumark sauðfjár á lögbýlum 2016.

Atvinnuvega- og nýsköpunarráðuneytinu, xx. xxxx 2016.

F. h. sjávarútvegs- og landbúnaðarráðherra,

Ólafur Friðriksson.

Rebekka Hilmarsdóttir.